

高平縣志 卷之十八

藝文

經世大業莫重於文明廷制作高文典冊彪炳古今馬  
班而降燕許以還冊府所傳胥歸不朽下此文人學士  
因事著言紀往昭來絜微曲折杼軸於懷大則世教有  
裨小亦纖微必錄誠亦有不容泯沒者一邑之山川人  
物締造經營卽事証文因文核事咏歌諷誦文傳而事  
與俱傳上可備採擇於輶軒下則播規爲於遐邇藝文  
所繫良該博矣纂輯志乘依次錄焉志藝文

詩

御製

賜高平知縣梅建咏蒙恬所築長城

萬里經營到海涯紛紛調發逐浮誇當時用盡生民力天下何曾屬爾家

扶風歌

晉  
劉琨

朝發廣莫門暮宿丹水山左手彎繁弱右手揮龍淵顧瞻望宮闕俯仰御飛軒據鞍長歎息淚下如流泉繫馬長松下發鞍高岳頭烈烈悲風起泠泠澗水流揮手長相謝哽咽不能言浮雲爲我結歸鳥爲我旋去家日已遠安知存與亡慷慨窮林中抱膝獨摧藏麋鹿遊我前猿猴戲我側

資糧既乏盡薇蕨安可食攬轡命徒侶吟嘯絕巖中君子  
道微矣夫子故有窮我欲竟此曲此曲悲且長棄置無重  
陳重陳令心傷

水經注丹水東南流注於丹谷卽劉越石  
扶風歌所謂丹水者也

同李太守北地泛舟宴高平鄭太守

唐高適

每揖龔黃事還陪李郭舟雲從四岳起水向百城流  
隨登陟嘉言卽獻酬乃知縫掖貴今日對諸侯

精衛

岑參

負劍出北門乘桴適東溟一鳥海上飛云是帝女靈玉顏  
溺水死精衛空爲名怨積徒有志力微竟不成西山木石  
盡巨壑何時平

和高平朱

一作米

參軍思歸作

韓 翃

髯參軍髯參軍身爲北州吏心寄東山雲坐見萋萋芳草  
綠遙思往日晴江曲刺船頻向剡中回捧被曾過越人宿  
花裡鶯啼白日高春樓把酒送車螯狂歌好愛陶彭澤佳  
句唯稱謝法曹平生樂事多如此忍爲浮名隔千里一雁  
南飛動客心思歸何待秋風起

精衛啣石填海

韓 愈

鳥有償冤者終年抱寸誠口啣山石細心望海波平渺渺  
功難竟區區命已輕人皆譏造次我獨賞專精豈計休無  
日惟應盡此生何慙刺客傳不著報仇名

山亭懷古

張弘靖

叢石依古城懸泉洒清池高低袤丈內衡霍相蔽虧歸田  
竟何因爲郡豈所宜誰能辨人野寄適聊在斯

高平東私路

李賀

侵侵櫛葉香木花滯寒雨今夕山上秋永謝無人處石溪  
遠荒澁棠實懸辛苦古者定絜尋呼君作私路

長平箭頭歌

漆灰骨末丹水沙淒淒古血生銅花白翎金鏃雨中盡直  
餘三脊殘狼牙我尋平原乘兩馬驛東石田蒿塢下風長  
日短星蕭蕭黑旗雲濕懸空夜左魂右魄啼肌瘦酪瓶倒

盡將牛炙蟲棲雁病蘆筍紅迴風送客吹陰火訪古汎瀾  
收斷鏃折鋒赤壘曾封肉南陌東城馬上兒勸我將金換  
簾竹

長平弔古

大愚公

長平埋碧血千古思悠悠哀壑青燐出雄風濁水流斷山  
吹舊雨殘葦泣新秋何處欃槍沒悲悽若解愁

長平

胡曾

長平瓦震武安初趙卒俄成戲鼎魚四十萬人俱下世元  
戎何用讀兵書

寄題西京致仕張郎中靜居院

宋韓琦

院爲今之高平靜居村郎中名完有四堂夷心會真清

白金蘭

休官得宴閑理固居處靜中或不自達觸物擾天性遂令  
優游心反致寂寞病二川有耆英識豈斯人並周才當要  
職美譽著群聽氣體殊未衰援禮請還政安居得西歸蕪  
沒治三徑蕭然絕世行日以道自勝以靜名厥居內外了  
相稱君懷本清虛復此林泉瑩君道本和樂况有琴尊冷  
新堂闢四隅立意尤高迥夷襟造真境友益具子令藥品  
稽神仙門法尙忠正肌膚松菊香庭砌芝蘭盛天宜錫難  
老以示君子慶予亦希君者誤寵竊機柄無裨紫極尊動

有赤松興報國苟鎔銖竄身  
陷阱雅志吁未偕高山徒  
景行

經戰地

魯交

長平爭戰地黯慘無人耕  
戰士報國死寒草迎春生  
沙飛賊風起晝黑陣雲橫  
未持天下箒何以掃欃槍

錢東之教授惠澤州呂道人硯爲賦長句

陳與義

君不見銅雀臺邊多事土  
走上觚稜蔭歌舞餘香分  
盡垢不除却寄書林汚  
縑楮豈如此瓦凝青膏  
冷面不識奸雄曹呂翁  
已去泣餘泣通譜未許  
弘農陶暮年得君真耐久



摩挲玉質雲生手未知南越石虛中亦有文章似君否西  
家撲滿本弟昂趣清尙濁何年分一朝墮地真瓦礫莫望  
韓公無瘞文

長平懷古

孫冲

邯鄲無策信馮亭上黨須貪澤起兵趙括母言猶不聽當  
時誰肯計長平

前題

朱正辭

草深荒壘對長亭枉是當年殺趙兵今日聖朝無一事只  
聞邊戶樂昇平

衍祥符壬子歲出宰平隄道由泣氏嘗賦長平詩二

韻天聖己巳後忝移用觀孫朱二君留題爰錄於此

天聖九年八月

杜衍

馮亭獻地豹言非秦間廉頗又不疑四十萬兵降死後渾  
輪括母一先知

留題長平驛

梁鏜

秦趙均爲失霸圖起何殘忍括何愚殺降未見無禍者累  
將其能有種乎日暮悲風噎丹水夜深寒月照頭顱快心  
千載杜郵劍人所誅耶鬼所誅

勸學

黃廉

河東人物氣勁豪澤州學者如牛毛大家子弟弄文墨其

次亦復誇弓刀去年校射九百人五十八人同賜袍今年  
兩科取進士十子釣海登靈鰲邇來習俗益遷善家家門  
戶爭相高駝兒市上買書讀寧使田間禾不嫗我因行縣  
飽聞見訪問終日忘勤勞太平父老知此否語汝聖世今  
難遭欲令王民盡知教先自鄉里烝群髦古云將相本無  
種從今着意鞭兒曹

寄申百勝三首

金劉昂霄

直氣南山相與高爭教塵土浣青袍征科頗似曾料理差  
勝叅軍作馬曹

執版那能拜下風世間禮數困英雄狂歌醉舞人誰識

悴通泉郭代公

連昌能隔幾牛鳴不見令人鄙吝生  
乘興時思一相訪劇談豪飲見真情

悲長平

蕭 貢

秦兵伏甲武安西趙將非材戰士携  
千里陣雲沉曉日萬家瓦屋震秋輦  
哀纏朽骨天應泣怨入空山鳥不棲  
百戰區區竟何補阿房烟草亦淒迷

糧山積雪

王 綱

大糧山頂雪成堆趙壁秦城迹已埋  
獨喜豐年應有兆陽春一曲向誰裁

高平道中望陵川二首

此縣先隴城府君恭和中舊治

元好問

列宿澄明墨綬尊中臺良選到名門來時珥華誇健訟去  
日攀轅餘淚痕一片青山幾今昔百年華屋記生存恭和  
遺老今誰在向道甘棠有子孫

鈴閣文書到酒卮諸曹小吏亦鈔詩座中佳客無虛日簾  
下歌童盡雅辭棠棣有華移舊巧櫻桃和露鞞繁枝書郎  
零落頭今白腸斷荷衣出拜時

南門關

高門關頭霜樹老細路千山萬山繞亂餘村落不見人雪  
霰霏霏暗清曉莘川百里如掌平閑田滿眼人得耕山中

樹藝亦不惡誰遣多田知姓名許李申楊竟何得只今唯

有石灘聲

許致中楊湯臣申百勝李仲常名宦四家隱羅氏時以多田推之亂後俱不知所在矣

潞州形勝

李晏

東迎谷口疊群山吞吐嵐光紫翠間削玉遠排珪首銳暈  
痕輕拂黛眉彎五龍飛去松杉老萬井喧囂日月間遊客  
乍醒塵土眼仙局誰指扣元關

白巖寺群山環抱村落相望亦奇觀也惜乎無水因  
作絕句書石當有水出

只有山光無水聲我疑神物固巖扃如何鑿得飛泉出當

爲山僧叱六丁

山寺尋春春已遲  
紫梅猶有折殘枝  
老僧兀坐如枯木  
花謝花開總不知

五龍祠禱雨

麥稿禾焦厭火雲  
引觴潛禱五龍神  
君能借我青驄馬  
傾倒天瓢濟此民

嗅梅圖

李仲畧

靡靡霽色冷黃昏  
缺月疎籬水外村  
人在天涯花在手  
一枝香雪寄銷魂

南征道中

申萬全

回首秋風謝敝廬  
崎嶇又復逐戎車  
人生行止原無定

葦江湖縱所如

病中遣懷

浪走天涯歲月侵  
病中猶作越人吟  
野麋本自便豐草  
倦鳥寧當忘故林  
画像功名元有命  
乞墦富貴果何心  
幾時真脫塵囂累  
巖穴尋居不厭深

綵樓

李俊民

高平縣綵樓聞之舊矣今始親見議者猶謂高下侈麗不及向者三分之一因感賦之

層層華構高且崇  
萬綵糾結填青紅  
何人下手奪天巧  
都入意匠經營中  
書契以來未省見  
異事驚倒百歲翁  
郢斤



般斧莫敢近欲立屏息慚無功寒窓憂憂鳴機婦積年朽  
軸一日空山川詐可錦繡裹塵土盡皆羅綺封前者攀轅  
後者挽奔車逕欲趨靈宮三年送迎禮雖舊人事不與天  
時同方當炎厲行夏令權勢大抵歸祝融神之於人無厚  
薄蓋以至誠能感通豚蹄豆酒道傍祝所獲神賜亦已豐  
閭閻疾苦還知否我爲大夫歌大東

上長平寄楊成之

衰遲長在外矍鑠愧征鞍世路驚心惡天風刮面寒迢迢  
人漸遠冉冉歲將殘今夜梅梢月同誰共倚看

送郭上舍淵之回高平

劉龍

功名牽引客京華三載萍踪始到家準擬蛟龍得雲雨不  
應騏驥困泥沙春光欲動柳先色殘雪未消梅已花画紙  
攤書人共喜更無魂夢繞天涯

長平戈頭歌

劉基

長平戰骨烟塵飄歲久遺戈金不銷野人耕地初拾得土  
花漬出珊瑚色邯鄲小兒強解事枉使泥沙埋利器四十  
萬人非少弱勇怯賢愚一朝棄陰坑血冷秋復春朽壤食  
盡蒼蛇鱗湮淪長愧杜郵劍廢墜空憶春籛人故壘中宵  
鬼神入雲愁月暗戈應泣嗚呼當時豈無牧與頗戈乎不  
遇可奈何

長平戈頭歌

陶凱

長平野人鑿地得古戈上有欵識字歲久俱滅磨惜不能  
如豐城古劍射牛斗吁嗟戈乎奈爾何但見青銅凝寒暮  
烟紫月黑山深夜飛雨恨血千年猶未消荒郊夜夜啼冤  
鬼當年趙括輕秦人降卒秦坑化爲土嗟哉趙亡秦亦亡  
落日荒城自今古摩挲爾戈一問之令人爲爾生愁思何  
不以爾爲鐘鐻何不以爾爲鼎彝吁嗟戈乎徒爾悲爾今  
還當太平世人間銷兵鑄農器願壽吾皇千萬年終古不  
用戈與鋌

精衛操

王達

海之水兮靡可量余之怨兮旣綿且長志殊苦兮力日偏  
西山木石有時盡海不枯兮愁不忘

長平

謝 肅

引輓方上牛參旗正南舉行行埃路明忽在長平聚脚躄  
念衰韓不得守茲土嫁禍於趙國移師與秦拒趙卒一以  
坑秦兵肆攻取惜哉廉將軍制敵中且沮遂令銳頭兒殘  
暴踰猛虎善戰服上刑賜劍非弱主咨爾頭顱山委命復  
何語

宿長平弔賈魯

薛 瑄

長平驛是相公家不見當時富貴花只有蒼蒼喬本在空

今猶宿夕陽鴉

白起荒臺

喬宇

赤旗晝拔光狼城趙人十萬坑長平丹水河邊有冤谷古  
魂夜嘯風雨聲千載空城樹無葉曾爲將軍駐旌節沉鎗  
出土丰未銷古血青青蝕寒鐵

武安城

李夢陽

孤城突如塊據山瞰流水誰能經營之無乃秦白起東北  
連長平遙遙數十里想是擊趙時卜此御旌壘鳴鼓收降  
旗一坑萬人死耀武恣暴君貪功泣冤鬼白骨蔽邱原霜  
風慘陰晦進爵食武安聲名播青史迄今千百年此城名

高平縣志 卷之十一  
尙爾先王重民命師行非得已何以納來降屠戮比螻蟻  
坐驅文武民盡入虎狼齒春秋誅亂臣功罪不相擬善戰  
服上刑聞諸孟夫子

送郭刑部守寧波

高平郭瑾自刑部郎中守寧波

何景明

漢廷黃綬吏西省白雲司豈謂爲郎久猶言出守遲雲霄  
懸賜履江海入褰帷古趙今名郡風流當在茲

酬郭內翰上陵還詩

帝遣朝陵日暫辭供奉班楸梧開玉殿雲霧宿春山晚向  
松間散晴從花下還知君有佳句傳向五陵間

送張御史巡畿內

高平張雲路巡南北兩畿

漢京樓殿鬱雲虹  
淮海文章御史驄  
三輔自來多寇盜  
五陵今日更英雄  
埋輪亦在都亭下  
攬轡仍行甸服中  
滹水太行烟霧裡  
獨看高隼擊霜空

過長平作

王世貞

世間怪事那有此  
四十萬人同日死  
白骨高於太行雪  
腥并作丹流紫銳  
頭豎子何足云  
汝曹自死平原君  
烏鴉飽宿鬼車痛  
至今此地多愁雲  
耕農往往夸遺跡  
戰鏃千年土花碧  
卽今方朔澆豈散  
總有巫咸招不得  
君不見新安一夜  
秦人愁二十萬鬼  
聲啾啾郭開賣趙  
趙高出秦壘也送  
東諸侯

宿長平驛

常倫

青史哀降卒山川見故邱重來今日意不盡異時憂野驛  
春花發長途宿雨收遙聞田父語猶得舊戈矛

咏米山

李雪山

積雪如山夜唱籌廉頗爲趙破秦謀將軍老去三軍散一  
夜青山盡白頭

丁卯九日登米山直賦其事

劉鴻訓

天光清且和人事復空平弟兄闈中來淡焉無競名白石  
增一歲射覆如後生羽客真仙子宛也水澄泓宗人翁與  
子恬恬忘世營余亦兀病人暫釋髻下楨眉宇若爲開小



隱忘其程陟巔中舖前羅列指高薨不圖厨中兒搏黍和  
虛錫亦日登高餐不奉主人呈佳言物外發嵒趣僂雲征  
往者豈不樂今日居其彭

九日登米山

米阜自無恙米船書不足今秋泉脈生十里環新瀆高矚  
興欲舒雲開懷不束嶺頭陳五羸觴政俱離俗鳴鏑衛長  
戈稍爲時所局海風東北來苧袷肌生粟四覽未周迴三  
卮方接續自分酒力薄西山峙寒玉好况兼素交不盡宣  
衷曲候吏簡牘催令人欲僕僕此日尙勞騷何時脫蠻觸  
馬上照流波塵容聊浣浴

高云鼎示  
卷之一  
九日眺米山得見字

耳後流光滅如電眼前米阜類相見每逢重九來此遊主  
人不惜羅芳宴阿誰主人曰松臯臯下松濤如海淀海淀  
當年醉茱萸戚里風光目爲眩何如長白九十峯竟似燕  
山分半面崑隈撥換此鐘孤獨枕佳園乃奇羨培塿有靈  
今始知搖曳白虹牽素練昔時兵衛尙登臨去歲衝泥勞  
眷眷惟有此會神情徹骨清冷風抖擻棕櫚薦米山草堂  
今成矣黃金莫惜爲佳院主人道力淡且真此地風流應  
久擅千種豪華湏掃除但留芥蒂非方便請看頭上未滿  
輪纖塵飛不到冰片

定林寺

崑端古寺動岳思  
斷碣荒臺勢若夷  
一勺寒泉無日夜  
前朝遺事半迷離

送劉弼父令高平

屠隆

玉鞭裊裊紫絲韁  
馬上秋雲擁太行  
三晉河山雄自昔  
聖朝况復起循良

驪駒一曲指西河  
紫氣關門仙令過  
君去山川堪遠眺  
古來汾水白雲多

獨登秦白起城

郭新

弔古誰同我高呼  
只有天山來秦帶  
晉水去趙歸燕鳥  
叫

高平縣志 卷之十一  
黃雲壟牛耕白骨田屯軍人已沒遺恨尙年年

長平和薛文清韻

李栢

借問長平賈相家滿天風雪積瓊花依然流水丹山險栢  
木森森幾度鴉

勞勞亭

地路衝三晉勞勞此建楹風霜勤夙夜車馬苦追迎一箸  
千錢盡連受百里驚問中愁未了又見嶺頭旌

冬次長平更次文潞公韻

名勲豈係幾行書妙用當年總不如可恨趙秦征戰罷至  
今遺跡論兵車

長平弔古

陳均揆

戰鬪於今歷有年長平之名邑乘傳戰士骷髏歸碧土騷  
人憑弔問蒼天六王將畢四海一將不知兵國與敵嗟吁  
四十萬人骨未冷甫傳二世秦鹿失人生夭壽宰於命國  
運延促力難競以秦爲鑒不鑒秦八千子弟兵徒勁

吉祥寺

郭鑿

珠宮隱蘿薜客至午初開嶺檜斜侵閣溪流曲抱臺憑高  
玄思發送酒白衣來麋鹿平生性無嫌冒雨迴

曉發高平

侵曉理飛節驅車南郭驅辭親北堂下悵悵涕沾裳遐阻

意方眷王事未敢遑駕言出舊閭仗劍登前岡律律僕夫  
職駢駢征騎翔虞虞原草媚習習晨颺揚矯首睇雲鵠路  
岐情內傷丈夫志四海兀處曷能臧

觀出師

郭鑿

吉日王師出貔貅左右分天威嚴北伐將令肅中軍鍊騎  
翻胡幕瑀戈指塞雲定知清絕漠會待奏華勛

金峯登眺

郭鑿

徐徐曳杖步葱嶺振衣直上千峯頂藥餌隨吾卧翠微此  
身疑在蓬萊境松音恍惚作梵音林影依稀似禪影三晉  
人物雨聲中秦趙旌旗荒吾隱古今塵跡俯仰間安遇漁

樵同劇飲前岐渾似武陵源倦遊渴飲丹砂井何日香山  
締舊盟千仞鳳翔皆引領上方風景斃徘徊童岡金澗煩  
襟騁肯將綠野負烟霞夢入羲皇卧高枕

石堂別墅

郭東

結廬石堂會行坐見南山梅帳塵囂隔茅齋趣味閑苔痕  
侵砌畔草色映簾間地僻兼心遠棲遲未欲還

懶逐追趨後鍾情獨在山百年寧有幾萬事總皆閑倚杖  
晴嵐外開樽芳杜間陶生怡悅處無意九衢還

一邱藏我拙小構儘依山水月心偏靜烟霞思獨閑釣竿  
橫沼上樵笛起林間底事辭軒冕金丹欲返還

避喧弛俗擔白社結青山歲月壺中永風光林下閑謀生  
磽确裡適意莽蒼間春雨肥黃獨長饒自勵還

宅西有岡土人傳呼高屋上疑昔時有宏構也耕犁  
所及頗多瓦礫世代不可稽矣予因建文昌祠桂  
香亭於上漫成一律

當年高屋何人建此地猶傳高屋名塵世滄桑湮棟宇溪  
山形勝自迴榮築亭漫意繩前構詒穀還期拓後營人傑  
地靈應有待文昌篤祐萬年宏

### 登玉皇閣

翠嶽高巔挿碧空山河城市顧瞻中天風遙御雲端裡疑



是瑤京第一宮

長平弔古

蕭 啟

驛路臨長平驛亭繞古木風葉落寒濤雲林接崑崙谷丹河  
留舊名戰場作新陸嗟彼趙公子枉爾父書讀臨陣無計  
謀一敗身卽仆遂致不仁徒得以肆驕毒四十萬雄兵僅  
留二百卒枯骸盈野疇英雄依草木逝水咽不流母言可  
三復

勉學諸生

史可行

大明光八紘吾皇聖天縱撥亂開太平嘉祥致麟鳳輔治  
求文儒才能俱錄用乘驄過雷封少緩青絲鞚縣官佇郭

門知法禁迎送相隨謁泮宮興伏禮云中濟濟來珮中瑯  
瑯奏絃誦載瞻先達祠人物列唐宋玉立廟廊姿名成總  
鄉貢古今時則殊道義人所共諸生繼芳躅美質皆出衆  
明堂若需材期爾作梁棟

送劉和宇使秦藩便道覲省

王家屏

綠鬢神仙侶青雲侍從臣校藜依日月捧節下星辰桐葉  
遙分陝皇華故使秦脈膺周典禮帶礪漢冠紳宴設新豐  
酒花明灞澹春舉帷瞻華嶽飛旆渡漳濱上黨傳經地西  
京作賦人趨庭紆畫錦里閤溢光塵

璩節婦瑞芝墓

劉鳳池

桑鶉貽古刺女子其和同大節乘塵土誰能起  
邵子婦遭涉多艱窮殘燈照深閨秋壁鳴寒蟲嗟嗟未亡  
人九原信可通震雷轟景臺齊史昭天功靈苗豈無謂而  
產佳城中九莖絢嵒谷五色耀晴虹天桃恥凋落願比蘭  
桂叢馨馥流千古令名與之同嗤彼濮上女何殊犬彘行  
陰柔性易轉書爲座右銘

骷髏廟

于達真

此地由來是戰場平沙漠漠野蒼蒼恒多風雨游魂泣如  
在英靈古廟荒趙將空遺千載恨秦兵何意再傳亡居然  
祠宇勞瞻拜不信骷髏亦有王

教場閱武

枹鼓中原久不鳴  
軍容乍整古長平  
山雲欲吐千夫氣  
河勢長嘶萬馬聲  
北旅看來曾是陣  
牙旗建處始知兵  
安危保障須賢令  
誰道金湯只在城

長平弔古

呂純如

荒涼鬼火夜磷磷  
白骨黃沙共慘神  
豎子無謀終覆趙  
將軍有勇亦亡秦  
招魂不入春閨夢  
揮淚常沾壯士巾  
幸遇太平皆帝力  
敢辭駑馬逐風塵

三月晦宿長平驛偶成

鄭旻

平川渺渺帶重岡  
秦趙當年此戰場  
阮火幾隨塵劫盡  
夕

流猶自咽衡漳

烟籠古驛柳依依賈令池臺今是非傍晚停車來住宿客  
塵遮莫送春暉

長平弔古

卜汝梁

趙兵四十萬生聚在何年一朝爲秦坑是孰驅之前陰雲  
慘白日西風號九泉林林億兆衆豎子頭可懸甘心受大  
戮白骨深谷填磷火夜夜明難消萬劫冤快哉杜郵劍庶  
幾稍有天丹河流不盡此恨終綿綿

別東穀孫給諫

王世隆

風塵驚見子歲月苦離羣遠道悲黃鳥山花照夕曛疏留

青瑣闌劍帶紫星文何日三台上相邀奉聖君

禽語

楚辰山中有鳥焉每至四五月時則鳴其聲大而甚明  
土人譯其音遂名之曰乾柴乾槁今晉地山間亦有之  
則名之曰青田田而譯之其音以爲蠶老防火其實本  
一鳥而晉楚之人其名不同若此蓋楚人重竹木之利  
晉人尙蠶故因其地與其時之所急而託名以警人也  
然楚之竹木以爲利而晉之蠶則實病焉蓋自數年以  
來災沴相仍征科益急耕夫女紅皆困竭矣肉食者將  
無憂耶乃槩其語而爲之詞

乾柴乾槁蠶老防火青田田夜不眠歲織幾疋絹不得身  
上穿田中苦旱復苦雨舊逋未了新逋至努力經營納租  
稅半入王孫充祿米王孫出城騁遊戲一擲千金償歌妓  
鈔空乞米仍去城有司逮責民益貧空責有司王孫不知  
民貧奈何王孫實多山西之地北控黠虜西臨犬戎障蔽  
京輔屹然虎熊休養生息一宜豐隆政煩賦重民乃窮民  
窮盜起人洶洶前年寇青羊去年寇靈石未必良民甘就  
死要亦催科激之耳我願天王慮終始子子孫孫千萬世  
山西之民宜早恤禽語雖微有至理

高平夜思

黃洪毗

秋聲入竹夜窻虛一劍相依萬里餘賓雁不傳雲外字天  
鷄獨理案頭書烟籠銀燭臨風舞露濕黃花對月疎三晉  
地形天下險丈夫許國欲何如

弔尙節婦

未識夫面爲夫亡豈比尋常烈女行白髮尙然移晚節青  
年誰肯棄春光魂歸地下乾坤老名在人間草木香吾不  
等閑輕下淚爲伊千載振綱常

送黃侍御

張雲路

驄馬西來此地遊觀風唐魏舊皇州山川搖動飛霜電隼  
鷂高騰侍冕旒白筆裁詩驚杜臆使星依漢望仙舟聲名



到處狐狸遠四境蒼生始末愁

長平驛

晉定王

月淡星稀曉色晴一鞭直指到長平山川滿目清如許千載猶傳賈魯名

咏賈魯

賈生姓字冠名流卜得林泉傍此邱古木至今風颯颯黃昏唯聽鳥聲幽

賈平章

無名氏

傍天驛舍傍雲開故第猶傳賈相材憶昔當年寇平仲一生無地起樓臺

金峯宴集

裴宇

追歡覓勝地登眺及芳辰  
雲擁山嵐秀風搖柳色新  
笙歌臨緝室樽俎共朝紳  
梓境情方愜臨岐又問津

骷髏山

李濂

骷髏山下合秦軍  
穉子坑降獨不聞  
落日沙原重回首  
長平雲接杜郵雲

重九遊西山

郭嗣煥

恒陰不覺過重陽  
信步凌風陟紀堂  
蹊徑欲攀履趾滑  
接籬爲蔽雨絲涼  
村醪對酌由人醉  
野菊閑收任自香  
囊裏茱萸相競插  
何妨歸興坐中忘

石朵驚秋

張翮

樹滿空山秋實肥  
埜人躡蹠著繩菲  
不知歲月林間晚  
瀚海先驚玄乙歸

十里蒹葭秋水灣  
琅園舊在翠微間  
山行忽訝鐘聲起  
碧冷遙欽煙作鬟

輓渭南令

中原寇騎接函關  
如馬櫂雲戰血斑  
睢水忠魂還共許  
漁陽義舌獨推顏  
關河懸日終留照  
姓字如山不可刪  
報國一心空有恨  
漢宮秋冷鳥飛還

輓渭南令

張流謙

萬里江山倏已非，渭陽孤守欲誰依。  
嬰城尙厲身先士，抗賊何妨血染衣。  
慘澹頓移天地色，摧殘未盡鬼神機。  
成仁取義諧君願，莫用招魂望遠歸。

長平八子詩

程康莊

陳壺嵐

壺嵐曠周旋，十春謀一面。  
網戶傾陳醪，掃徑通群彥。  
山色棲城頭，長河淨如練。  
邱壑滿胸中，浮華豈能眩。

姬相周

姬公方下士，返駕更延賓。  
登山倚卽墨，衣敝不重陳。  
春城羈旅客，遲暮但經旬。  
二子遠來謁，翛然同避秦。

申葵裘

申子寒穠破粗屨通面屏迎賓無雜座賃屋半疎櫺始交  
若有契坐久更忘形獨謂吾詩老終當託汗青

武君十

君十愛樓遲銜觴事林壑俯視塵土腥亡簪茹藜藿關我  
匪由天板纏聊見薄剝有素心人同期馭鸞鶴

陳吾青

吾青旣藏輝裘敝舌亦禿獨念王子方經天注東哭當時  
英雄人潛鬪何太速不如飲美酒逸光向岳獨

龐鳩六

鳩六屣履迎投轄若不早下榻雖未成所感在懷抱竹箨  
時寫書開樽驗文章相契已忘言鴻名永爲寶

石泰華

泰華恩感人豁達吐懷素累觴求一醉情神與之赴顧見  
日將昃風塵漉剋互常恐促歡節酒向西光妒

武二酉

二酉富詩書拳芳眇流輦蝸舍取厨烟隨階有餘態共友  
檢農皇曬藥松陰肯卜築本無塵丹砂有時配

空倉夕照

王徽

遠山晴色帶斜暉山下人家半掩扉村樹亂鴉棲不定數

聲樵唱隔林歸

長平弔古

胡希顏

羊犬當年犯虎狼長平一鼓盡坑亡血隨流水凝青艸魂  
逐秋風戰白楊豎子陰謀成是算括生兵法豈爲良停車  
弔古傷心後俯仰乾坤正杳茫

米山定林寺

國朝 畢振姬

黏天峰側野橋灣米子開州直寺間白鹿去來小朗洞青  
羊今古大糧關詩禪四壁香留座宦學三年御見山回首  
懸崖清入夢石淙花雨水潺潺

弔楊渭南死事

蓮嶽青天絕西風戰血收荒城鬼火斷落日禹河流直道  
榮今古藏書信魯周文章功罪核君父死生憂薤露眠孤  
鶴烽煙噪野鷗沂山焚舊誅樗里杖新楸石凍蛟龍雨蕉  
寒士女秋旅魂宵練蝥歸路晚潮留宿草魚鱗變溫綸馬  
鬣酬陰房招未得關月慘蘆洲

雪後望吉祥寺松

雪隱禪花石磬閒上方僧衲帶雲還一龕冷浸琉璃鏡門  
外蒼龍吼萬山

夏遊西山

鐘聲午樹隱胡麻十里山椒見一家古廟毀垣苔半合畫



龍提雨石壇霞

野老逢人出遠田  
新煎大麥捧茶煙  
坐中指點神叢裏  
沙石牛畊四五年

韓王寺

步邑侯  
侯公韻

畢澍

龍吟石鼎大年長  
坐卧碑陰病亦香  
麋鹿野心詩畢曜  
麒麟高步寺韓王  
苔衣洗鉢山頭雨  
草甲橫戈日脚陽  
水盡南天四百院  
問師何處負繩床

長平坑歌

王士祿

虎狼之秦胡不仁  
銳頭小兒服振振  
劫灰更促括也將  
一戰趙壘成埃塵  
白骨嶽積四十萬  
至今此地無青春  
丹河

水繞發鳩麓指點當年趙兵跡土人往往坑旁耕拾得殘  
戈或斷鏃鏃頭長以寸戈頭長以尺持將磨向丹河沙古  
血猶腥土花赤省冤谷接武安臺南來遺跡仍崔嵬應共  
髑髏山下月夜深同對鬼燐哀

遊定林寺

王邦柱

由來不識定林寺此日相攜作勝觀法象莊嚴金色古靈  
湫噴吐玉聲寒苔封崑徑穿雲入花散清空過雨看靜對  
老僧猶結夏午天無暑到蒲團

韓王山

張沂

天開疊巘插雲霄側袒臨風入望遙與月始終澄夜氣共

雲來往認巖樵山山秋洗僧伽衲葉葉霜催鷹隼驕爲遠  
塵囂尋勝迹重來禪院聽蕭蕭

輓渭南令忠烈楊公

兵燹集重圍長虹起渭濱挺身飴白刃灑血耀青燐華嶽  
留生氣關河壯死臣遠巡今尙在千古共成仁

長平行

官于宣

古今有奇慘莫過長平道冤魂四十萬飄零成腐草驅車  
已昏黑殷勤進父老父老前致詞往事傷懷抱使君且秉  
燭賤叟請具述竊聞周命衰奸雄羣逐鹿秦國類虎狼盛  
氣欲吞六初猶親穰侯旣乃得張祿不敢兵加趙所忌頗

與牧千金行反間奇兵試埋伏蚩哉趙家兒曾把父書讀  
年少初至軍盡更諸約束上將未知名佯敗卽追逐堅壁  
不得入覘臺已斷築絕糧五十日人馬齊枵腹勢窮自搏  
戰徒死恐不速數十餘萬命一旦填溝壑何曾聞闕聲解  
甲坐受縛屍積凌太行血飛噴王屋爺娘與妻子何處認  
爾骨膏漬少波瀾河染成丹蘄猛獸沃心肝饑烏啄其目  
一飽不再過汚漬無復肉廢竈寂無煙楛顛白似月嗣自  
逢天陰逞逞聞鬼哭燐火暮趁人日落不敢出夜坐影危  
疑獨居神恍惚傳自唐元宗題作省冤谷置封骷髏王以  
鎮厲鬼族至今存有司祀典不少闕農夫田間來古跡時

發掘戈頭黃金花箭頭青銅簇出之與衆視制廣鋒稜薄  
戰國養兵器近代無此物太息彼趙王豎子亦推轂垂老  
廉將軍揮淚見覆沒用人信惟舊善敗能不辱秦將武安  
君窮兇勝檣杌螻蟻眎人命萬死正莫贖逆料邯鄲圍秦  
師勢必屈此亦有良算誰識蒙顯戮殺降至不祥况乃恣  
荼毒更聞新安城楚亦坑秦卒趙卒爲秦坑前後慘相續  
天意如轉圜物理有報復每思全盛世脩德恥窮黷始知  
兵不精百萬徒碌碌今茲王報庄一帶戰場曲風雨洗腥  
臊山河靜草木賴見人烟稠且慶嘉禾熟俯仰數千年雜  
聒屢更僕我聽父老言我爲父老祝千秋殺氣盡永介斯

民福

東畢四世

白孕謙

吾愛畢四世矯然獨鶴立沈淡類楊子奇亦與之敵舉世  
服其才難可得物色以我爲桓譚雀羅或見式長安攫金  
地行客夜不息屏居數椽遠嘔血病窘嗇大道本龍蛇人  
無金石質有酒不共飲何爲自徽纆

高平田沛蒼侍讀枉駕草堂忽猝未盡款待作此寄  
謝

高軒度鄰邑山路景依依未滿留歡願虛令乘興歸朝儀  
期早侍農俗重相違惆悵花谿月難同理玉徽

過高平弔畢亮四方伯

陳廷敬

重過躬耕地秋原木葉稀一哀銜別路雙淚落行衣書札  
臨危在文章付託非淒涼荒宅里清德耿餘輝

高平道中望城北人家二首

陳豫朋

僕僕征車塵滿襟故侯池館北城陰粉垣畫閣斜陽外似  
隔蓬山十萬尋

望去疎村一徑斜春風未放小桃花酒人曾話當壚地白  
板雙扉第幾家

長平懷古

裴希度

高墉斜日水潺潺薄暮雲生殺谷間鐵甲解時坑趙卒金

鞭敲處築秦關徒教父子從軍去不使兒郎策馬還四十  
萬人身莫問頭顱收拾在荒山

輓渭南令

陳昌言

維公之品渾樸俱備維公之腸忠貞不二秀鍾懸壺綫分  
渭治無端欒槍突而恣肆身犯其鋒舌詈罔憚事聞九閭  
恩來殊賜立人之道曰仁曰義仁至義盡參天兩地

輓渭南令

趙進美

二嶠風雨車麟麟黃巾百萬西入秦司馬敗北義兵走憑  
陵不異沙與塵百城錯落數千里誰能不降復能死渭南  
縣令爾何人乘陣一呼劔者起須臾城開接短兵巷犬不



吠雞不鳴父老痛哭子弟盡秦雲晝暗野火明凝碧池頭  
氣蕭屑堂上烏啼燈半滅十月阿房草盡枯縣令屍出皆  
猶裂此時清渭仍向東高天獵獵來悲風山鬼窈窕巫陽  
泣愁見中原落照空

訪畢亮四同年

魏象樞

門前如太古客到始開關猛覺烟霜近猶非竺石間奇文  
開奧交道氣豁堅頑此夜無秋夢應從悟後刪

哭畢亮四同年

負耒躬耕百畝寬此身生死在雲巒誰從海內知班馬我  
向山中識范韓萬卷遺書皆手澤千秋佳話一清官重來

應 詔傷遲暮不是中朝荐士難

輓李慶餘少司寇

初疏情詞已自哀  
楊前仍荷 玉音來  
百年氣向封疆盡  
一代名歸遲暮才  
難報 王恩兒輩在  
欲垂家訓義堂開  
過門不敢輕揮淚  
自有星光燭夜臺

輓李慶餘先生

田六善

十年疆域積殊勲  
喜拜新 恩掌白雲丹筆方  
揮臨燭淚  
緋衣早索記樓文  
于公德澤君堪許  
晏子仁言誰再聞  
歸櫬蕭條書數卷  
千秋景鑑在高墳

遊定林寺

李棠馥

一逕縈紆上扶筇到碧岑  
天香飄法界秋爽徧空林  
樹色聯旛影泉聲和梵音  
陶然塵俗遠携手共長吟

小春遊法雲寺

攀蘿穿石徑直上翠微巔  
巒聳瞻天近峯孤得日先  
蒼茫平野色縹緲戍樓烟  
身出浮雲表啣杯意爽然

步司馬兄携友遊定林寺韻

李棠薌

攬勝過蕭寺秋山歛翠容  
苔封迷曲徑壁峭響懸淙  
說法花應墜忘機鳥樂從  
由來逃俗意邱嶺寄崑蹤

登臨期縱目輕屐入雲岑  
雁影橫低岸蟬聲下遠林  
山嵐新爽氣杯酒舊知音  
遞跡皆疎散相携起暮吟

賦謝田大中丞枉顧

王奕駒

朝風暮雨獨淒其何事高軒過  
兼籬夢幻不知長夜黑拘  
攣常繫故人思門因有禁難  
遲客庭爲無人可賦詩莫道  
窮愁頌著作龍門往事正堪悲

仲夏將有事於麥隴邀社友觀刈陳壺山發句云田  
家五月秋蓋山中寔錄也各以茲句成篇用紀厥  
事

龐大樸

扇暑長風起田家五月秋農書占大有  
帝籍荷天休望  
隴黃雲盡搖天青浪收殊方多碧種何用遠相求

秋山寒雨

陳燧

一葉飄桐滿地秋  
巢雲高閣湧蛟流  
孤村烟漲山連水  
野渡泥封馬當舟  
牧笛數聲驚睡鶴  
樵蓑一隊起寒鷗  
蓐收淨洗恒河界  
珠樹曇花點碧邱

初春小山

樂聖西南峪  
蒨葱一水隈  
樹枝肥未葉  
石面老生苔  
城郭雲中見  
樓臺畫裡開  
滄浪知可濯  
於此謝塵埃

僧院對竹

陳 烜

亭亭唯覺此中寬  
精舍慈雲隱画欄  
出土便知終有節  
幾回風雨報平安

題長平驛壁

董文驥

上黨南來狼孟城連山地險不利兵鼠鬪穴中勇者勝父  
書能讀徒空名趙王何愚趙人哭國中壯士盡長平土花  
血碧拾金戟戰場處處今人耕已降殺盡爲鬼雄前有銳  
頭後重瞳杜郵之土烏江水劍且賜兮船自艤六十萬人  
含笑死

過長平西村故居有懷寄三山

張道湜

突起驅虎豹儒生非爲家萬姓倒懸解海水靜江沙及夢  
二犬言山川皆震動出險待七年經綸足智勇我走光狼  
道人尙說雄風菘竹青松宅而無王乾公歎息伊人遠寂  
寞太行空

輓畢亮四方伯

趙介

雲埋韓嶺月葉落損秋神誰續文章古空留道氣醇故人  
心未死知己淚方新笛冷山陽夜吹殘夢裡春

輓畢亮四

傅山

鸞鳩斥鷃欲誰何水擊三千笑則那帶血銅華丹嶂合揮  
毫風雨黑雲多山川明晦隨融結西北文章任詆訶始啓  
王侯安足道才名十倍大名過

過長平秦趙戰場之間得三章焉

傅眉

傾國重兵爭要害將軍枹鼓係存亡雲前趙血孤城紫沙  
裡秦人戰日黃白起暗來無敢洩廉頗再至亦須防豈容

枕息邯鄲外西上臨洺卽虎狼

敢有旌旗摩澤潞豈無鼓角震邯鄲竟來三國膏肓地直  
上中原背脊看卽不代韓先受禍何能與趙坐相安鄭朱  
弗出虞卿媾不信秦人敢暴殘

秦王顛倒多奇畧六國偷存怨暴強共看公然趁上黨無  
聞問道襲咸陽古來離合君臣際偏是英雄性命當思用  
趙人空至老猶能馬上愈悲涼

行取留題二首

白良玉

七年不取一文錢好惡同民夜告天謾道古法難作命綸  
音諺荷姓名先



此日征車出縣城蕭蕭琴鶴束裝輕不知父老謳思否回首猶深撫字情

乙卯春賦別白梓潼父師

牛兆捷

鸞栖枳棘亦爲緣緣斷飛鳴自九天過眼功名成剩物從頭膏雨自長年蘭臺此日欣瞻斗青史他時不恕賢黃霸神君多少憾公才十倍望加前

送晉高士王西村遊廬山

金德嘉

扁舟一葉下潯陽爲訪青衫舊草堂真個廬山今到手康王谷口樹蒼蒼

振衣一眺官亭湖五老青巒入畫圖蘚苔山僧磨石壁徐

凝惡句洗應無

送王西村同門謫閩中

范鎬鼎

聖賢用鈍全身名豪傑以快遭顛仆在事無如鈍有餘忍  
辱何妨快不足快心之事不可爲快心之言毋輕吐詩云  
出好是興戎蛾眉入宮斯見妒平陸隄防三峽危談笑埋  
藏九重霧莠苗不願穀苗肥醉漢寧容醒漢寤作雲作雨  
反掌間白衣蒼狗變朝暮噫嘻明哲如先生通塞莫能逃  
乎數振羽高飛向海天匣劍帷燈休再誤把酒銅鞮奈若  
何憐君翻作規君賦

贈姬文學

陶自悅

高平姬子字仲貽我奇其詩人更奇雲堆老屋村底任黃金散去羞低眉紉蘭結萑好裝束凌波容與遊江妃東隣醜女嫁都盡髮白頭上終無筭有來十問九不應半是真聾半作癡偶然發口吐微詞令我狂叫還解頤其詩緬邈晉與魏其人磊落夷與齊我脩百年未脩志束帛往聘來官司一見儻然俗情遠塵污百出逃靈犀能蒐古文出碑碣善鑿法器分尊彝畢公妙秘世不識爲我乞得訂謬遺直取淄澠辨丹沁更移鼎畢侵參觜一主一佐畢公賜嗜奇想見君所爲大笑吟君臘香詠和章環疊如堦筮我今歸去君莫悲我歸思君刻君詩劉父數首頗倔強昌黎之

外賞者誰子雲死後子雲生千秋萬世知有姬從頭甲子  
細編輯倒笑授我慎勿遲

過長平驛感坑卒事有作

高其倬

丹水橋邊落日明頭顱山畔晚烟生千年碧血無遺燐幾  
簇黃沙有廢城陰密復冤酬上黨新安坑卒祖長平紛紛  
豎子真兒戲齒冷西來阮步兵

秋霽涉雲自灑然有作

姬鼎燕

熟路經行處秋來幾作緣雨痕分竹勢雲影亂茶烟出鳥  
鳴高樹無懷學古天此中聊復爾那更得林泉

蠟香咏

蜜脾蜂衙釀衆香東君參意啓花王深深靜婉音徽迴落  
落風流故態狂天許孤清盟碩果冬教土德懋微陽林逋  
莫憶江臯佩老徹環瑱不嫁郎

蠟香世外畸逸惜也擬其倫于梅豈所稱無名氏而牛  
馬任呼者與甚或此離處士之妻模糊介主之鈿抑更  
寃矣近古來耑題絕少無亦神物怙愛其寶而嫌名適  
所稱自昧與曷若令此種獨往獨來孤行天地清非矣  
俗熱不因人覺山谷簡齋二小詩尚屬逗露余也詹詹  
妄擬子墨多見其不知量猶之以牛馬呼也知我罪我  
敬俟將來

招雲寺信宿

絕頂凌霞秀茫茫  
逐眼空披雲  
摹薛壁把酒問蒼穹  
有社遲元亮  
無言叩遠公  
依稀聞靜籟  
却誚耳根聾

長夏閉關讀書歌

畢 灤

計年日有三百六  
潛修常苦日不足  
維茲夏日長於年  
竹牖松扃等空谷  
生意橫窓草不除  
架插縹緗上連屋  
晝漏遲遲靜掩扉  
琴聲間歇書聲續  
唧唔一室夏雲深  
風度疎林鳥佐吟  
洗心棲穆塵囂隔  
駕筆勤耕墨島陰  
犁雨鋤晴六經畔  
晨夕何須傷獨日  
開帙古人覲面來  
宛如坐我青玉案  
有時夜詠月當頭  
乘興牙籤任意抽  
賞到奇文頻擊

節一聲長嘯凌千秋况今身依帝闕奎垣闢提撕幸獲  
師資益遭逢壽考作人長分寸光陰倍自惜

咏史二首

館試  
第一

深源未應聘林泉負盛名舉世仰丰采高風傾公卿朝廷  
設壇席儼如待神明夫何身既顯未厭觀聽情徒令千載  
下寡效議書生曠懷古君子能藏復能行出則弘遠謨處  
非盜虛聲立身有本末所係良非輕

先哲唯知道藏脩不近名豈曰乏才華識量自深宏史稱  
王楊輦髫年早蜚聲文章推四傑落筆風雲生英氣露眉  
睫直欲凌公卿夫何難致遠翻爲識者輕三復行儉言深

人嘆息情生才天有意莫自負玉成

丹朱嶺

朱樟

丹山搆鳳穴朱明揭洞天二名今合併茲嶺乃高騫昔者

堯禪舜處子臨丹淵

漢律歷志堯處子朱於丹淵

地記苦茫昧陳迹多

妄傳我曾讀酈注丹林探洪源

山海經水經注丹水源出丹林朱字乃後人妄增耳

方其未濫觴一竇流涓涓東注會荒谷巖崖互變遷膚寸

夏雲合猛雨盈百川丹谷獨後至厥勢張蜿蜒象水就繩

墨吞吐不敢前逡巡如有待濡沫空迴漩冰學蠖蜒抱河

疑精衛填截流翁巨口縮氣窺龍蠕移時乃涌發其來也

忽焉相隨決渠下霆奔下井關冬芹忍寒淥暖性抽翠烟



沙戶咸報賽沉璧祈豐年斯語或不謬側聞父老言晨光  
逗東谷摩頂春松圓危石露青泚細草呈絳妍捫苔識篆  
籀好事留神鑄

嶺上有明陳御史裴題名

虞賓倘陟降望古轉悠然

### 米山

城下何須庚癸呼不妨聚米繪山圖居人莫笑三遺矢曾  
問將軍善飯無

### 高平書事

絲穿驛路遶平岡高阜參差半夕陽箭鏃含冤蕤殺谷戰  
壕留鬼咲輸場帘飄澹白梨花釀門掩深紅柿葉霜籬外  
幾番嘯絡緯不知織女爲誰忙

喬村驛

百箔蠶收響絡車綠陰忽轉露人家春鳩懶喚茶藤雨夾  
路香清讓棗花

人如劫後喜重逢官紙新題赦螫龍雨鬣烟針無恙在驛  
樓東岸兩株松

時有議伐兩  
松者檄止之

長平箭頭歌同穆門

太白星流狂食昴邯鄲軍餓廉頗老谷口悲風送冷雲不  
許東方發紅焰綠衫小吏倚驛門箭頭拾自王報村土花  
暈碧古血死剩此寸鏑鳴秋冤鈍簇三稜露髀脊挾詐殺  
降誰畫策毒雨崩城戰壘隳猶見沙壩未蕘骼

甲寅秋高  
平嶺樓臺

崩一角尙  
見遺骨  
頭顱大者爲鬼雄國殤  
祭春旂紅左更已齒  
杜郵劍豈得留住咸陽中  
過客吟詩弔殘鏃怕向西郊買  
繁竹猛焰難銷秀鋌山  
凶鋒蚤脫魴魚籠丹林一水涓涓  
流上黨鬼哭韓陘愁四十萬人同穴  
塋蒿塢剪草迷青邱  
莫鯤箭頭腥莫洒長平涕坑趙坑秦同一例償爾新安一  
半魂復仇喜得虞姬壻

風穴

噫氣洩土囊一竅主耗溢三日先吟風自口吐而出三日  
例納風侈口咽而入呼吸如有神譚理涉怪譎叠彩颺吟  
呀比屋戰蕭瑟非遷孟婆居豈鑿析丹宅殺角轉四時地

籟乍奔逸怒者其誰耶自取恐過寔時方困乾封占雨候  
鶴埵密雲自西來陰翳可蔽日伯也不我慈朋扇助嘯叱  
屯膏凶已兆應雪期屢失輸誠塞旱洞我躬未遑恤空傳  
梵語靈僧咒演禁律姑吟過客詩未補救荒術

曉行至馬村

曉行寧不畏短袖溼秋痕野霧截三里孤烟覆一村草荒  
斜轉路藤窠曲藏門茲地宜淳朴從誰細討論

小野川

居人無大姓一水互灣環黃染去年樹青來外縣山籬喧  
雞再乳沙耗鷺長閑不信重陽過巖花類菊斑

王報村二首

石田細草剩朱殷  
滿谷秋魂散未還  
倒盡酪瓶重訪古  
陰蟲嘯過鬪髀山

村前村後鳥呼風  
雁筍鋪烟箭血紅  
一笑杜郵人齒劍  
不知坑趙有何功

賈村二首

門臨丹壑夕陽多  
父老猶能說治河  
岡口埽臺移故道  
可憐恩怨兩消磨

明初有題長平驛詩賈魯治黃河思多怨亦多百年千載後思在怨消磨見堯山堂

外紀

徐州戰後死濠州  
故宅於今改驛樓  
一桁虹梁眠十丈  
高

明鬼瞰定生愁

驛廳五間一梁貫之八猶及見也

再過長平驛題賈左丞宅

杜寨楊村落照中誰憐五舍是孤忠

魯子五舍元亡殉節碑記

不須再

賦長沙鷗一例承塵破廟風

長平箭鏃行

周京

長平箭鏃長一寸三角觚稜枯鋒鈍銅花上澁磨不光猶  
是當年血腥暈我思秦旣殺人不用兵商鞅阡陌蒙恬城  
戰功特數殲趙卒四十萬人同一坑嗟乎自起殺降亦不  
勇解甲拋戈在樊籠詐使易欺括小兒一劍仍教杜郵捧  
至今患氣狸雲昏精靈哭野夜號門村民頂禮羈縻骨飲

食祭祀安寃魂安寃魂省寃谷口鷓鴣聲池魚未許遭煎  
烹秦歟趙歟空紛紛千年箭頭猶留齧過客黯慄徒酸聞  
可憐誰說廉將軍

贈李夢明

朱本素

韓王峯頂石峻嶒想見孤標第一層家計甚輕甘讓產宦  
情久失固辭徵雲山採藥鋤隨屐雪案攤書酒拌燈會看  
桂枝花朶旋秋香庭院露華凝

金峯晚眺

平臺高敞俯晴川一寄情懷擬昔賢令節恰當新霽後深  
秋最好夕陽天飽嘗首蓓經三載醉插茱萸又一年歧望

家山橫翠靄蕭蕭烟樹晚風前

段際唐一室義行

李培蔭

卓哉周纂之東里凜凜義行有段氏義在男子篤友恭義  
在婦人知生死從來商賈重貨財同室之人分彼此際唐  
賢勞歷苦辛絕甘分少全兩弟兩弟全兮身已摧呻吟床  
蓐運何否小星割股起沉痾人情極處卽天理羸怯尙能  
育嬰兒方之伯道事尤美誰言妻妾不相容惟鄭於吳反  
生喜吳旣拋兒殉夫亡鄭乃從容撫孤子撫孤成立與捐  
軀孰易孰難摠一是遠近聞者咸嘆息鬚眉巾幘俱罕比  
老夫漫賦詩一篇異傳其事於青史



菊圃書懷

并力芸荒圃蕭然物外情  
年衰忘紀甲食盡怯呼庚  
蔬果三時熟風光一味清  
山農爲伴侶好醜與誰爭

贈孝子李東二首

喀爾欽

萬里尋親志不回  
山蟲野賊漫相摧  
迷魂纔定悲魂結  
腸斷珠崖負骨來

落日孤踪瘴海邊  
艱難歷盡慰窮泉  
須知此事宜傳布  
可當風詩陟岵篇

余昔閱兵潞澤信宿高平  
李少司馬園林今重過此  
地風景不殊園亭如故  
偶得長律書誌瞻懷并以

勗其後人

阿里衮

尚書清節冠通侯曾記巡方枉昔轡邸第樓臺猶舊澤園  
林花木又清秋山程信馬知前路魚鳥親人若故儔爲語  
烏衣諸子弟好思名德副旁求

宿李少司馬園亭和阿大中丞原韵 德 保

園亭瀟洒舊公侯冬日凌寒漫駐輶問竹那須尋蔣徑看  
花何必是新秋中書事業存方簡元禮家風憶故儔定有  
先聲能繼者予將爲 國網羅求

寫懷

石中玉

有限光陰不再逢蹇驢破帽逐東風無名花放空山裡得

意詩成野寺中少壯未遭青眼客衰年誰信白頭翁陽春  
一曲難爲和異世桓譚注五衷

懷司靜山

苗令琮

石末宜孫里蒲溪幾曲深先生白雲侶小隱紫峯陰松老  
著書日草知觀化心侯芭好奇字載酒欲相尋

贈司靜山

竇漢輔

嶻嶭韓山入紫冥烟霞深處有伊人交情風雨餘三載別  
怨星霜歷五春獨識剛腸仍是鐵相看斑鬢摠如銀千秋  
大業今藏否時仰元亭擬卜鄰

岳居感興八首

司昌齡

幽居屏人事齊彼得喪端息機觀群動勞勞足憫歎坐卧  
萬卷中千古共盤桓寂靜起道心花鳥助文瀾雖無榮貴  
樂而覺夢魂安不剖亦不別吾璞可自完胡爲逐名利時  
與憂患干

號物數盈萬賦予從大造自非平心人烏能窺其妙昏庸  
多富厚賢哲翻潦倒逐貧苦無術窮鬼紛來誚日月環九  
垓豈此獨遺照富厚名磨滅賢哲青史耀得失將有在無  
爲遽相笑

蘭生深谷中寂寞發奇馨豈因美人折始襲國香名秋菊  
含佳色九月乃吐英胡弗麗三春與彼桃李矜清芬足自

賞淪落見岳貞嚴霜將下降此復益崢嶸芳艸且有守何  
况松柏莖

肝膽可御窮緩急仗朋友信義君子重流俗爭杯酒當其  
相須時親若左右手所求既已遂棄擲等敝帚安樂且如  
此患難復何有朱穆著絕交翟公署門首自古人所歎達  
者終存厚

江漢深且廣欲濟苦無梁雲臺高且貴欲登誰相將顯晦  
各有營時命亦有常苟無塵外賞物色但驪黃綠耳服監  
車偏側奚騰驤鍾期不失聽琴韻乃洋洋人苟遇知已衰  
老復何傷

昔在少年時嘗夢登五岳置身霄漢際俯視但漠漠又聞  
五陵源桃花猶灼灼洞天多異人晤言洵可樂何圖俗累  
牽老大成濩落高舉無羽翼遠遊將安託探奇志不遂胸  
中自邱壑

節序荏苒逝韶華黯淡過慷慨欲振厲精力已消磨聖人  
惜寸陰下士每蹉跎苦無曠然識隨俗任網羅德業不加  
進毛髮空自睎望古長太息對酒益悲歌嗚呼少不勉老  
矣可奈何

世運有循環人情如轉軸君子守其常所凜在繄獨衾影  
苟無慚身貧內自足矧余稟先訓夙夜念遺躅顯揚愧未

能安敢輟誦讀永持歲寒心老至肯貽辱敝廬聊足愛詩  
書可式穀

懸壺山

高平舊志傳此山爲費長房遇壺公遺蹟中有洞或云  
藏仙書於此又有祈夢處考後漢書遺蹟應在汝南不  
知何以在此也

欲問仙翁事有無登臨不厭此山孤曾聞下蔡龍爲杖未  
見長平鬼懼符祈夢石床心悵望尋書出洞意踟躕玉堂  
嚴麗空傳說剝得烟鬟入酒壺

定林寺

張又華

峯高逼星河，谷轉盤石磴。絕頂噓遠風，隔林聞鐘磬。古木  
靄餘清，名藍踞嵒勝。階前衆壑險，窻外飛瀑競。峭壁蟠長  
松，虛亭通危徑。澄靜照禪心，空翠悅鳥性。夏日雨復佳，歸  
雲棲不定。嵐氣蒼然出，界破天宇淨。坐對白足僧，逍遙萬  
緣屏。竹色侵衣裾，仙梵滿清聽。虹散夕陽沉，群山亂欲暝。

炎帝陵

雲中髣髴見靈旂，空石陵前宿草腓。禾黍百年思帝力，冠  
裳萬國肅神威。翠屏墓枕寒烟重，丹水碑開夕照微。遺廟  
不隨滄海變，千秋俎豆有光輝。

廉頗屯二首



十里長平道愁雲戰後多荒涼留趙壁弔古憶廉頗有險  
空如此當年竟若何大糧山水爲我助悲歌

駐馬荒屯下淒清白露天高臺遲暮日野徑斷人烟艱阨  
君臣遇飛揚少壯年藺生真足慕終老趙山川

廉頗屯

張承綸

堅壁收精銳臨危仗老成蜂屯米子國虎視武安城一飯  
心猶壯千金間已行壽春思趙卒垂白涕縱橫

按昭明文選選家之始也詩賦列於前雜文以類叙  
纂輯藝文首詩冠以

御製一章示尊且昭明例也至文不從類隨時代編蓋志

非選文資以核事事有廢興本末先後因時可考故  
變例焉

詩餘

附

望海潮

代州南樓

金趙可

雲朔南陲全趙幕府河山襟帶名藩有朱樓縹緲千雉回  
旋雲度飛狐絕險天圍紫塞高寒弔興亡遺跡咫尺西陵  
烟樹蒼然時移事改極目傷心不堪獨倚危闌惟是年  
年飛鴈霜雪知還樓上四時長好人生一世誰閑故人有  
酒一尊高興不減東山

驀山溪

賦崇福荷花崇福在太原晉溪

雲房西下天共滄波遠走馬記狂游正芙蓉平鋪鏡面浮  
空欄檻招我倒芳尊看花醉把花歸扶路清香滿 水楓  
舊曲應逐歌塵散時節又新涼料開徧橫湖清淺冰姿好  
在莫道揔無情殘月下曉風前有恨何人見

好事近

密雪聽窻知午醉晚來初覺人與膽瓶梅蕊共此時蕭索  
倚窻閑看六花飛風輕止還作箇裏有詩誰會滿疎籬  
寒雀

浣溪沙

擡轉爐薰自換香錦衾收拾却遮藏二年塵暗小鴛鴦

落木蕭蕭風似雨疎檣皎皎月如霜此時此夜最淒涼

又

火冷薰爐香漸消更闌撥火更重燒愁心心字兩俱焦  
半世清狂無限事一窻風月可憐宵燈殘花落夢無聊

望海潮

發高麗作

按朱竹垞詞綜作贈妓

雲垂餘髮霞拖廣袂人間自有飛瓊三館俊游百銜高選  
翩翩老阮才名銀漢會雙星尙相看脈脈似隔盈盈醉玉  
添春夢雲同夜惜卿卿 離觴草草同傾記靈犀舊曲曉  
枕餘醒海外九州郵亭一別此生未卜他生江上數峯青  
悵斷雲殘雨不見高城二月遼陽芳草千里路傍情

卜算子

譜太白詩

明月在青天借問今時幾但見宵從海上來不覺雲間墜  
流水古今人共看皆如此唯願當歌對酒時長照金尊  
裡

鷓鴣天

金絡閑穿御路楊青旗遙認醉中鄉可人自有迎門笑下  
馬何妨索酒嘗春正好日初長一尊容我駐風光歸來  
想像行雲處薄雨霏霏洒面涼

又

十頃平波溢岸青草香沙暖水雲晴輕衫短帽垂楊裏楚

潤相看別有情 揮彩筆倒銀餅花枝照眼句還成老來  
漸減金釵興回施春光與後生 集句

鳳棲梧

霜樹重重青嶂小 高棟飛雲正在霜林杪 九日黃花才過  
了一尊聊慰秋容老 翠色有無眉淡掃 身在西山却愛  
東山好 流水極天橫 晚照酒闌望斷西河道

婆羅門引

保德西樓作

李晏

汗融畏日豈知高處有風清 倚闌襟袖涼生 坐上看崩雲  
脫壞不礙亂峯青 待目窮千里却怕傷情 河汾古城聽  
裂岬 恐濤驚好是烽沉 岳障鼓卧邊亭 西樓老子更無用

胸中十萬兵酒到處莫放杯停

虞美人

佳人酒暈紅生頰灩灩霞千疊雨餘紅淚濕黃昏誤認當年人面倚朱門  
飄零又送青春莫帳望劉郎去教人不恨五更風只恨馬蹄無處避殘紅

鷓鴣天

苒苒萋萋雨後村芳塵不到五侯門曾隨曉淚撩詩思又向春風入燒痕  
春去後憶王孫啼紅南浦記芳溫夕陽樓外連天遠乞與騷人怨楚魂

菩薩蠻

回文

斷腸人去春將半歸客倦花飛小窻寒夢曉誰與画愁眉

臨江仙

晚秋

明郭盤

風厲霜淒將日暮空林鴉鶴齊鳴蘭臯芳歇靡蕪平風前  
傷葉落飄轉類浮生况是悲秋秋更晚衷腸欲訴誰明  
美人不見獨含情今年看又盡何日續幽盟

阮郎歸

趙軌

月觀風亭鎮日閒瑤琴慣去彈鶯聲只在柳頭喧蟬驚逝  
不還榴花噴小荷翻綠水遶曲欄鷓鴣喚起情無言風  
涼不用紈

蟾宮曲

重過山亭

國朝

田光復



跨山隈窈窕圍亭經一度花新又一度花新繞迴廊梧竹  
青青疾一陣風聲湧一陣風聲倒芳樽催佳句想一段歌  
行寫一段歌行藝名香調清韻按一曲瑤琴奏一曲瑤琴  
歸去也晚涼細生留一歩月明隨一歩月明

雨窻愁

元夕感懷

畢 溱

上元佳節火樹銀花士女盈香陌怪殺春光偏妬客一刻  
千金客裏何消說 故園景色今夕何如千里雲山隔處  
處相同惟有月也照歡顏也照愁眉曉

雨窻愁

七月三日夜雨忽憶去年北上正是日也年  
華一易小詞誌感

蕭條院宇兀坐黃昏簾外風吹雨夏去秋來如逆旅鎮日

淒涼管甚寒和暑 愁思幾許去歲茲辰行色匆匆苦料  
得家人相對語未卜歸期先把行期數

按詩餘無預于志也顧通志府志胥有錄焉拾遺所  
載附諸詩後亦以見高平先達長于倚聲之學者正  
不乏人文雅風流一斑可見後進之士不可咏歌興  
起歟

高平縣志 卷之十九

藝文

馮亭以上黨入趙

戰國策

秦王謂公子他曰昔歲殺下之事韓爲中軍以與諸侯攻秦韓與秦接境壤界其地不能千里展轉不可約日者秦楚戰於藍田韓出銳師以佐秦秦戰不利因轉與楚不固信盟唯便是從韓之在我心腹之疾吾將伐之何如公子他曰王出兵攻韓韓必懼懼則可以不戰而深取割王曰善乃起兵一軍臨滎陽一軍臨太行韓懼使陽城君入謝于秦請効上黨之地以爲和令韓陽告上黨之守靳黈曰

秦起二軍以臨韓韓不能支今王令韓興兵以上黨入和於秦伊陽言之太守太守其効之靳黈曰人有言挈瓶之智不失守噐王則有令而臣失守雖王與子其亦猜焉臣請悉發守以應秦若不能卒則死之韓陽趨以報王王曰吾始已諾於應侯矣今不與是欺之也乃使馮亭代靳黈

馮亭守三十日陰使人請趙王曰韓不能守上黨且以與秦其民皆不欲爲秦而願爲趙今有城市之邑七十願拜納之於王惟王才之趙王喜召平陽君而告之曰韓不能守上黨且以與秦其吏民不欲爲秦而皆願爲趙今馮亭

令使者以與寡人何如趙豹對曰聖人甚禍無故之利王

曰人懷吾義何謂無故乎對曰秦蠶食韓氏之地中絕不  
令相通故自以爲坐受上黨也且夫韓所以內趙者欲嫁  
其禍也秦被其勞而趙受其利雖強大不能得之於小弱  
而小弱顧能得之強大乎今王取之可謂有故乎且秦以  
牛田水通糧其死士皆列之於上地令嚴政行不可與戰  
王自圖之王大怒曰夫用百萬之衆攻戰踰年歷歲未見  
一城也今不用兵而得城七十何故不爲趙豹出王召趙  
勝趙禹而告之曰韓不能守上黨今其守以與寡人有城  
市之邑七十二人對曰用兵踰年未見一城今坐而得城  
七十此大利也乃使趙勝往受地勝至曰敝邑之王使使

者臣勝告太守有詔使臣勝謂曰請以三萬戶之都封太守千戶封縣令諸吏皆益爵三級民能相集者賜家六金馮亭垂涕而免曰是吾處三不義也爲主守地不能死而以與人不義一也主內之秦不奉主命不義二也賣主之地而食之不義三也辭封而入韓謂韓王曰趙聞韓不能守上黨今發兵已取之矣韓告秦曰趙起兵取上黨秦王怒令公孫起王齮以兵遇趙于長平

史記七十城作十七城

拜度遼將軍臨行上疏

後漢  
陳龜

臣龜蒙恩累世馳騁邊陲雖展鷹犬之用頓斃邊塞之庭魂骸不返薦享狐狸猶無以塞厚責荅萬分也至臣頑駑

噐無鈇刀一割之用過受國恩榮秩兼優生年死日永懼  
不報臣聞三辰不軌擢士爲相蠻夷不恭拔卒爲將臣無  
文武之才而忝鷹揚之任上慙聖明下懼素餐雖歿軀體  
無所云補今西州邊鄙土地墾墾鞍馬爲居射獵爲業男  
寡耕稼之利女乏機杼之饒守塞俟望懸命鋒鏑聞急長  
驅去不圖反自頃年以來匈奴數攻營郡殘殺長吏侮畧  
良細戰夫身膏沙漠居人首係馬鞍或舉國掩戶盡種灰  
滅孤兒寡婦號哭空城野無青草室如懸磬雖含生氣實  
同枯朽往歲并州水雨災螟互生稼穡荒耗租更空闕老  
者慮不終年少壯懼於困厄陛下以百姓爲子品庶以陛

下爲父父焉可不日旻勞神垂撫循之恩哉唐堯親捨其子以禪虞舜者是欲民遭聖君不令遇惡主也故古公杖策其民五倍文王西伯天下歸之豈復輿金輦寶以爲民惠乎近孝文皇帝感一女子之言除肉刑之法體德行仁爲漢賢王陛下繼中興之統承光武之業臨朝聽政而未留聖意且牧守不良或出中官懼逆上旨取過目前呼嗟之聲招致災害邊虜凶悍因衰緣隙而令倉庫殫於豺狼之口功業無銖兩之効皆由將帥不忠聚姦所致前涼州刺史祝良初除到州多所糾罰太守令長貶黜將半政未踰時功効卓然實應賞異以勸功能改任牧守去斥姦殘



又宜更選匈奴烏桓護羌中郎將校尉簡練文武授之法  
令除并涼二州今年租更寬赦罪隸埽除更始則善吏知  
奉公之祐惡者覺營私之禍邊馬不可窺長城塞下無候  
望之患矣帝覺悟乃更選岱并刺史自營郡太守都尉以  
下多所革易下詔爲陳將軍除并州涼州一年租賦以賜  
吏民

白起降趙卒論

魏何晏

白起之降趙卒詐而坑其四十萬豈徒酷暴之謂乎後亦  
難以重得志矣向使衆人皆豫知降之必死則張虛拳猶  
可畏也况于四十萬披堅執銳哉天下見降秦之將頭顱

似山歸秦之衆積骸成邱則後日之戰死當死耳何衆肯服何城肯下乎是雖能裁四十萬之衆而適足以強天下之戰欲以要一朝之功而乃更堅諸侯之守故兵進而自伐其勢軍勝而還喪其計何者設使趙衆復合馬服更生則後日之戰必非前日之對也况今皆使天下爲後日計乎其所以不敢復加兵于邯鄲者非但憂平原之補苴患諸侯之捄至也徒諱之而不言耳若不悟而不諱則無所謂遠智也可謂善戰而拙勝長平之事秦民之十五以上者皆荷戟而向趙矣秦王又親自賜民爵于河內夫以秦之強而十五以上死傷過半者此爲破趙之功小傷秦之

敗大又何稱奇哉若後之役戍不豫其論者則秦衆多矣  
降者可致也必不可致者本自當戰殺不當受降詐也戰  
殺雖難降殺雖易然降殺之害禍大于劇戰也

倉頡書契論

晉  
衛 恒

昔在黃帝創制造物有沮誦倉頡者始作書契以代結繩  
蓋觀鳥跡以興思也因而遂滋則謂之字有六義焉一曰  
指事上下是也二曰象形日月是也三曰諧聲江河是也  
四曰會意武信是也五曰轉注老考是也六曰假借令長  
是也夫指事者在上爲上在下爲下象形者日滿月虧效  
其形也諧聲者以類爲形配以聲也會意者止戈爲武人

言爲信也轉注者以老壽考也假借者數言同字其聲雖異文意一也自黃帝至三代其文不改及秦用篆書焚燒先典而古文絕矣漢武帝時魯共王壞孔子宅得尙書春秋論語孝經時人以不復知有古文謂之蝌蚪書漢世秘藏希得見之魏初傳古文者出於邯鄲淳恒祖敬侯寫淳尙書後以示淳而淳不別至正始中立三字石經轉失淳法因蝌蚪之名遂效其形太康元年汲縣人盜發魏襄王塚得策書十餘萬言按敬侯所書猶有髣髴古書亦有數種其一卷論楚事者最爲工妙恒竊悅之故竭愚思以贊其美愧不足廁前賢之作冀以存古人之象焉古無別名

謂之字勢云黃帝之史沮誦倉頡眺彼鳥跡始作書契紀  
綱萬事垂法立制帝典用宣質文著世爰暨暴秦滔天作  
戾大道旣泯古文亦滅魏文好古世傳邱墳歷代莫發真  
僞靡分大晉開元宏道敷訓天垂其象地耀其文其文乃  
耀粲矣其章因聲會意類物有方日處君而盈其度月執  
臣而虧其傍雲委蛇而上布星離離以舒光永卉萃尊以  
垂穎山嶽嵯峨而連峒蟲跂跂其峙動鳥似飛而未揚觀  
其錯筆綴墨用心精專勢和體均發止無間或守正循檢  
矩折規旋或方圓靡則因事制權其曲如弓其直如弦矯  
然特出若龍騰於川森爾下頽若雨墜於天或引筆奮力

若鴻鴈高飛邈邈翩翩或振腕縱那若流蘓懸羽靡靡絲  
絲是故遠而望之若朔風厲水清波漪漣就而察之有若  
自然信黃唐之遺跡爲六藝之範先籀篆蓋其子孫隸草  
乃其曾元覩物象以致思非言辭之所宣

移丹河記

武少儀

高平古泝氏邑也其沿代改名圖經詳矣初相地而居之  
蓋以土厚水深爲善農鑿井而飲者則以穿壤剖石爲艱  
故千家之中數井而已綆以遠引而多絕甓以難升而驟  
羸則雖有端賜之機智無施其巧捷雖有管寧之仁惠無  
杜其忿鬪况牛馬俟乎滿腹必遵十里之河而瓜蔬期乎

給口常望一旬之雨朝夕勞苦歲時饑饉可勝道哉嘻凡  
爲前弊滋久終俟後賢乃革不然者豈子男百輩而莫之  
是恤貞元七年潞州屯留令平原明濟受連帥相國大司  
空義陽王李公之命假領茲邑撫安疲黎其清勤簡惠不  
異于屯留之政政可知也下車之日咨訪故老問人疾苦

僉曰公之至也俗詠其燕矣惟水之歉詎敢求救于公耶  
明侯聞之若疚于心且形于色曰夫窮必有泰固常理也  
此豈無望前或未思吾將退而慮之由是發智周之妙躬  
循郊原目究川谷度高下之勢相引決之宜有丹水者始  
自縣之西北山源高而派平可議壅以導明侯載審厥事

將利于人乃下謀于鄉耆次白于郡守上言于節制才獲  
所請爰減其功乘井稅之暇俟農桑之隙先儲乎薪芻之  
物次具乎畚鍤之噐然後量工命日使里人樂助競于來  
而展力故不更素宛其有成始瀦流而爲潭因疏渠以遠  
郭築防以補其陷隳剝木以道其險阻脈分枝散貫邑周  
閭瀾瀾苔草之間陰陰槐柳之下遂使家開沼沚戶植菱  
荷濫觴可以寄傲垂釣可以烹鮮豈直豐畦圃之沃灌恣  
閭閻之飲濯路有奉漿之義井爲應汲之泉人無荷擔之  
勞畜無奔走之困而已也復于潭側特建水祠列樹敞亭  
別成佳境將俾水依神而永久人賴水而無極庶功用不



再且祈報有歸焉明侯覩夫衆情之欣洽足以閑居而賞  
玩化寫之餘閱王鳧之雙飛臨堂之際調宓琴而合響不  
甚美乎君子曰政無大小以勤民爲良事無工拙以利物  
爲貴如明侯者實兼而有之其由我大司空義陽王以至  
公且明推獎而致此者矣余偶以行役經過于斯耳聆嘉  
謠目覽異績緇黃耆艾因請余以紀事余誠忝跡于文者  
姑具述義王之德舉明侯之善亦何辭焉是則勉而志之  
貞元建

唐故將仕郎李亮墓誌銘

闕名

公諱亮字

闕

思其先隴西人也元元皇帝之後裔漢大

軍之孕緒原夫列相秦庭集金人之壯采稱君蜀道光玉  
壘之英躔或龜冊呈文擅芳聲於交趾或龍門啓譽泛仙  
艇於洛川並見重當時明諸史籙况宗連上路望接雲枝  
誠四海之名流諒九州之上族祖興朝散大夫趙州平棘  
縣令父倫皇朝上柱國並武昭七德文茂九功孝自生知  
忠疑天授蒞俗製五城之錦宣威靜萬里之邊公幼承庭  
訓達禮通詩遊習修常恭行孝悌情欽澹泊不尙繁華隱  
種山泉求從散職陳星詠月夕處朝遊未開榮啓之德已  
深劉損之瘼年六十有七終於私第夫人王氏四德彰聞  
早孀君子六行無釋琴瑟聲和鄭子齊姜詩稱舊好三周

之歡未盡九原之路已歸嗣子懷敬拊心扣地泣血流襟  
擗踊號天杖而後起開元十四年二月十一日合葬於高  
平縣東北十三里之甸禮也東西枚猗五福翊其靈南北  
腴區三光昭其境鶴山旣久無憂丁令之歌丹壑罔移不  
記麻姑之頌其詞曰肅肅我祖發自周年盡忠事主追孝  
承天扶疎拔萃玉潤珠連五侯將相裕後光前哀哀父母  
亭毒多方酬恩罔極泣血霑裳

晉文公守原議

柳宗元

晉文公旣受原於王難其守問寺人勃鞞以畀趙衰余謂  
守原政之大者也所以承天子樹霸功致命諸侯不宜謀

及嬖近以忝王命而晉君擇大任不公議於朝而私議於  
宮不博謀於卿相而獨謀於寺人雖或衰之賢足以守國  
之政不爲敗而賊賢失政之端由是滋矣况當時不乏言  
議之臣乎狐偃爲謀臣先軫將中軍晉君疏而不咨外而  
不求乃卒定於內豎豈可以爲法乎且晉君將襲齊桓之  
業以翼天子乃大志也然而齊桓任管仲以興進豎刁以  
敗則獲原啟疆適其始政所以觀視諸侯也而乃背其所  
以興跡其所以敗然而能霸諸侯者以土則大以力則彊  
以義則天子之冊也誠畏之矣烏能得其心服哉其後景  
監得以相衛鞅弘石得以殺望之誤之者晉文公也嗚呼

得賢臣以守大邑則問非過問舉非過舉也然猶羞當時  
陷彼代若此況于問與舉又兩失者其何以救之哉余故  
著晉君之罪以附春秋許世子止晉趙盾之義

靈泉禪院記

唐

司空圖

嚴飭祠宇非欲侈於自奉也蓋聳係人天資其趨善之心  
耳况帝夢可徵華緣已熟山川神祇罔不薦欵故自京邑  
以及遐裔勝槩相望皆莫厥居中條發於蒲企於良傑出  
而爲太行則天壇不得不冠冕嵩華爭勅日觀也其北川  
壑會流盤鬱濃粹自高平西顧以至靈泉極矣泉之爲靈  
非惟利物當以滋潤所及不育毒螫也其院東向顯豁直

巨大川端門洞闢正延旭日豈西方之書所謂震旦者此  
其證乎繚檻層甍金釃與泉壑相激梵磬爇香禽猿亦知  
肅敬真聖賢遊集所宜也且有爲無爲於我不礙弛之則  
若涸其中用之則若湧於外蓋克固其源乃能動而必濟  
也今禪宿洪密長老俗姓劉氏本儒家子早詣石霜契其  
大旨煩而不撓簡而必周始自清涼歷覽至是山乃創林  
棲之所遇太尉李公駐軍高平首資葺構遠近道俗莫不  
歸嚮今蒲留隴西左揆嘗因題記亦備贊揚則密公之道  
益光矣凡製經樓齋堂共一百餘間又示羅漢潔峻之相  
以漸化服而后日集方丈敷演上乘自江漢北渡以至魏

晉之交其俗堅悍難誘今則悉爲佛人矣且善教童儒者雖指擿其書而必以意返復曉諭當自釋然若編簡積於前笞撻駭於側彼將竄匿之不暇孰有悅而從命哉律刑書也經誥誓也禪乃誇勸之宗先馴其性而后入人者耳故其道主隱其功主博不可廢也嘗念畜役之外以逮傭隸雖豢養至豐莫不苦於受制殊不知羈鞅之勞或能避免而方寸之內不形不聲牙蘗牙萌詭其力者愈莫能爭以此淪陷死生之域綿劫不能自脫其苦何如哉噫苟非三世之尊夷山幹海之祖親授捩其鉞鉞長老繼作磨昏抉贖則彼搆火以自攻者雖焦爛而猶未悔也今乃聚其

徒侈其居永爲一方檀施之會且俾其人福慧偕殞然則  
密公之績焉可抑沒哉耐辱居士病且死不忍其門人惠  
依惠海之勤請也直紀所行惟以漏畧爲愧云

孔子畫像記

宋張持

唐吳道子畫孔子爲魯司寇時像二本乘車而群弟子從  
者謂之圖立而顏淵侍者謂之小影司門郎中王伯瑜傳  
小影於仙源孔氏蓋孔子四十七代孫襲封衍聖公蒙之  
所藏也傳於棣州碁石於學中世人畫宣聖往往訛謬不  
足考信此小影與今朝廷詔其家獻秘閣者乃此本也是  
知無妄矣其石後有東武趙挺之所題聖人旣不得而親



見之矣今誦其書考其行事而又刻其衣冠與夫儼然盛德之容日夜想像而潛心焉持承乏高平邑人興建學校患無真容以爲憂棣州教授袁百之偶以寄此上下悅之若合符然乃示工者法以像之別摹於石以安廟壁庶傳無窮也元祐三年九月二十五日奉義郎權知澤州高平縣事兼兵馬都監飛騎尉賜緋魚袋張持記

秦阮趙軍評

司馬光

夫兵之設非以害人所以養人也殘暴如此其誰與之秦七世役諸侯卒兼天下然其失策之大者有三焉欺楚懷王而虜之不信莫大焉阮趙降卒四十萬不仁莫大焉欺

與國誅已降諸侯疑而百姓怨不智莫大焉秦所以失天下之故多矣在此三者于不信之不信不仁之不仁不智之不智是以始皇墳草未生而四海橫潰宗廟爲墟究其禍本兆于此矣

晉城縣令題名記

程顯

古者諸侯之國各有史故其善惡皆見乎後世自秦罷侯置守令則史亦從而廢其後自非有功德者或記之循吏與夫凶殘之極者以酷見傳其餘則泯然無聞矣如漢唐之有天下皆數百年其間郡牧之政可書宜亦多矣其見書者率纔數十人使賢者之政不幸而無傳其不肖者復

幸而得以傳蓋其意與古史之意異矣夫圖治於長久者雖聖賢爲之且不能倉卒苟簡而就蓋必本之人情而爲之法度然後可使去惡而從善則紀綱條教必審定而後下其民之服循漸漬亦必待久乃淳固而不變今之爲吏三歲而代者固已遲之矣使皆知禮義者自其始至卽皇皇然圖所設施則亦教令未熟民情未孚而吏書已至矣儻後人之所至不同復有甚者欲新已之政而盡去其舊則其迹固已無餘而况因循不職者乎噫以易息之政而又無以託其傳則宜其去皆未幾而善惡無聞焉故欲聞古史之善而不可得則因謂今有題前政之名氏以爲記

者尙爲近古而斯邑無之乃考之案牒訪之吏民纔得自  
李君而降二十一人第其歲月先後而記之俾民觀其名  
而不忘其政後之人得從而質其是非以爲師戒云耳來  
者請嗣書其次

省冤谷記

金王庭直

少讀楊雄書有載長平之戰四十萬人阬死原野厭人之  
肉川谷流人之血蚩尤之慘莫過于此余三讀其辭而悲  
之後令高平問其自乃古長平也詢其故跡父老曰城西  
北十五里有地曰殺谷乃秦將白起坑趙降卒四十萬之  
所當時頭顱似山骸骨成邱何晏亦嘗哀悼至唐易名省

究則長平故事其來久矣辛酉清明日庭直率本土士衆  
携酒殺奉香火張聲樂具服祝謹詣其谷弔以祭之其日  
陰風襲人寒煙蔽空必有冤魂來享其祭舊宋運判馬城  
經過此地移檄縣僚收拾遺骸于谷口鑿坑深濶以左右  
前後溝壑數十里暴露之骼畢集而藏拵仍于所拵之地  
啟墳祭之使後人不踐履爾今觀其墳已爲姦農所侵僅  
存數尺而已乃勸鄰農于所占墳地外更四面各廣八步  
起供堂一所于其上植美木成圍俾永久知所悼惜繼有  
長平鄉老農王姓者告詣去谷十里餘爲雨水所崩岸崖  
頽裂露骨數車願收而拵之爰卽具禮盡載于墳圍如法

安葬細視其跡于長脛骨間存銅漆矢一入骨寸餘因出  
矢而拚之人骨之堅如此而骨中銅矢尚存慨然發嘆四  
十萬人于當時解甲歸戈赤身受亂兵殺戮而苦死其冤  
亦深矣然其骨其矢安得尚存而不朽卽是其冤抑之氣  
凝結而不散以至于此也嗟乎白起兇狠恃秦軍之強殘  
無心之降卒其勢亦易矣起直爲此兇狠也當年後世又  
安得而不痛恨哉向使趙卒未降甲戈在體雖在危陣中  
乃死戰之軍力戰未必無生路卽或敗亡未必盡遭此屠  
也譬猶執羊就機持刀自恃以爲能殺何以異是嗚呼今  
而後其墳併供堂告成一所見有暴露之骨卽拚其中余

不能無望于後之君子皇統改元時六月十三日縣令壽春王庭直記

最樂堂銘

元元好問

工部高平趙公德宇冲粹與物無競敝歷中外餘三十年朝廷自公宰士皆以爲君子長者晚節末路浮湛里社乃無失侯故將嶠憂憔悴之態詩所謂風雨如晦鷄鳴不已者于公見之新居有堂取古人爲善自得之義名之曰最樂以公平生攷之可謂無媿其名矣新興元某爲作銘曰樂外有終樂內莫窮惟樂焉有內外之別斯君子小人之不同大本在中至和與融涵浸薰醲四體以充孰不秉彜

而天獨以厚公醪醴腐腸鼓鐘闕聰誠有囂囂者存洵憂  
畏其誑攻相彼力田祗繫於逢就七遇之皆北要萬折而  
必東遼海管寧鹿門龐翁嵒蘭深林穆如清風雖心逸日  
休人知作德之所自至于身康強而子孫吉者將非爲善  
之功乎

辨史皇氏

羅泌

呂不韋之書曰史皇作書倉頡是也管氏韓子國語史記  
俱無史官之說據世本云史皇倉頡同階又云沮誦倉頡  
作書亦未嘗言爲史官也及韋誕傳元皇甫謐等遽以爲  
皇帝史官蓋輦繆于宋襄襄之世本注云倉頡沮誦皇帝



史官抑不知裘何所據而云末代儒流莫見其書更望望  
交引以爲世本之言世本曷有是哉竊嘗攷之倉頡之號  
曰史皇又曰倉帝河圖說微云倉帝起天雨粟青雲扶日  
語亦見之洛書說河而鴻烈解言史皇生而能書是則倉  
帝史皇非人臣之目明矣後世徒見其有史皇之名因謂  
爲史官爾史豈今之所謂史乎哉且上古始制文字者倉  
頡也而無懷氏已刻徽號伏羲氏已立書契俱在炎黃之  
前豈能至黃帝而始制文字耶此崔爰蔡邕曹植索靖顧  
野王之徒所以咸謂古之帝者爲得之矣雖然三五歷古  
史攷謂在炎帝之世其足信歟書疏張楫書云倉頡爲帝

王生于禪通之紀而丹壺記禪通之紀首列史皇氏則知  
楫書爲有據者衛氏慎到以爲包羲之前斯不誣也粵復  
訂之春秋河圖揆命篇云倉羲農黃三陽翊天德聖明說  
者謂倉爲倉頡羲爲包羲與神農黃帝之四君者俱能奉  
三陽以輔上帝益以諦倉頡之爲帝而在包羲之前矣故  
河圖玉版云倉頡爲帝南巡陽虛之山巡狩之事固非臣  
下之所行也昔者孔子嘗曰封泰山觀易姓而王可得見  
者七十有餘君三皇禪於繹繹五帝禪於亭亭三王禪於  
梁甫而莊周書言七十二代之封其有形兆壑堦勒紀者  
千八百餘所興亡之代可得而稽矣昔夷吾言於桓公曰

古之封禪七十有二家夷吾所記者十有二曰無懷曰伏羲曰神農曰炎帝曰黃帝曰高陽曰高辛曰唐曰虞曰禹曰湯曰成王皆受命而後封禪無懷乃在伏羲之前是其可紀者而不識者六十又在無懷氏前此皆孔子之得見者而七十二君之前又有孔子之不得見者則知封禪之文其來久矣上古之君其世夥矣壺記以史皇首禪紀梁未之盡也以彼其說雖不槩見于經然士攷質詩書以其所見推其所不及見則自無懷而上旣可得而論矣倉帝史皇豈得云人臣之號哉

明道先生歿幾三百年澤潞里館歲昵淫祀而嬉優伶才  
乏俗澆識者興歎由金源而來廟僅存者九里而已翼教  
授懷孟北歸始記勾要館召爲應奉翰林文字又記釜山  
館繼爲修撰又記河西館竊喜吾鄉人士可與爲善復嘆  
今之守令鮮循良以興起之也英廟臨御制召臺察歲舉  
守令延佑七年澄城簿郭質來宰是邑政治大行惟善以  
教稽之舊典興復米山等五十九里之文館像聖揭虔光  
輝盛德如瞻仰高深於闕里也泰定甲子翼以御史出僉  
淮西歸展先壟于高良米山人牛用等請曰令尹興學耄  
倡髻從求記麗牲之石以垂不朽噫聖天子崇儒重道于

其上賢百里承流宣化于其下凡爲人之子與弟者當念  
在上之恩朝夕黽勉從事於經學庶幾希聖希賢出則忠  
國處則孝家則鄉校爲不虛設矣若夫銜詞章徼利達孜  
孜於時好非翼之所敢知也旣以答用等且以識程子之  
後有能弘其道者爲循吏傳張本云質字彥文真定人

地震祭告文

明世宗

明嘉靖三十五年歲次丙辰二月二十九日皇帝遣戶部  
左侍郎鄒守愚致祭於南山之神海瀆之神曰維神受命  
上帝奠鎮一方茲者山西蒲解澤臨汾臨晉翼城聞喜襄  
陵靈石安邑滎河平陸高平芮城夏等州縣及河東運司

各因地震接連千里響聲如雷震倒房舍壓死人民不計其數惟茲災變異常余深用惶惻特遣大臣敬齎香帛往詣祭告伏冀神明贊天敷祐幹旋化機潛消劫難錫福生民地方其永賴焉謹告

羊頭山新記

樂律全書

鄭世子朱載堉

羊頭山在今山西之南境澤潞二郡交界高平長子長治三邑之間自山正南稍西去高平三十五里西北去長子五十六里東北去長治八十里所謂嶺限二郡麓跨三邑也山高千餘丈磅礴數十里其巔有石狀若羊頭覲向東南高闊皆六尺長八尺餘山以此石得名焉石之西南一

百七十步有廟一所正殿五間殿中塑神農及后妃太子像皆冠冕若王者之服按神農時尙未有衣冠之制不若設木主爲宜耳此殿以南屬澤州高平縣豐溢鄉團池北里殿之西北屬潞安府長子縣義豐鄉柵村里殿之東北屬潞安府長治縣八建鄉施莊里故俗說云前簷滴高平後簷滴長子謂此也殿西稍北二十步有小坪周八十步西北接連大坪周四百六十步上有古城遺址謂之神農城城內舊有廟今廢城下六十步有二泉相去十餘步左泉白右泉清泉側有井所謂神農井也二泉南流二十步相合而南寰宇志云神農嘗五穀之所上有神農城下有

神農泉後魏風土記云神農城在羊頭山其下有神農泉  
皆指此也地名井子坪有田可種相傳神農得嘉穀于此  
始教播種謂之五穀畦焉廟之西北一里許有黑龍池東  
北三里許有白龍池東南二里許有金龍池此三池惟金  
龍池大而且深高平志云金龍泉闊丈餘舊傳有二魚時  
躍於泉遇雨卽飛去疑龍也山之正東稍南一里餘有泉  
甚清泉西半里許有梵刹曰清化寺建自後魏孝文帝太  
和之歲初名定國寺北齊改名弘福隋末寺廢唐武則天  
天授二年重建改今額有碑乃唐鄉貢明經牛元敬撰并  
書其畧曰此山炎帝之所居也昔者攝提紀歲之後燧人



化火之前穴處巢居茹毛飲血爰逮炎皇御宇道濟含靈  
念搏殺之虧仁嗟屠戮之殘德尋求旨味以替羶腥遍陟  
群山備嘗庶草屆斯一所獲五穀焉記此靈奇顯其神異  
石類羊首遂立爲名於是創制耒耜始興稼穡調藥石之  
溫毒除瘵延齡取黍稷之甘馨充虛濟衆人欽聖德號曰  
神農歷代崇恩峯亭享廟其山也左連修嶺橫巨嶂而峙  
滄波右接遐峯列長關而過絳闕烈山風穴泛祥氣而氤  
氲石鼓玉泉洩雲雷而隱軼芬敷花藥春夏抽丹荔鬱松  
蘿秋冬聳翠人天交集仙聖遊居譬鷲嶺之靈宮猶鹿苑  
之佳地播生嘉穀柱出茲山矣字乃行書道勁可觀頗類

聖教序其而○等文非篆非隸蓋武氏所製字也碑陰識云所有當寺方圓八里東至秦關古道下面東西石楞并虎谷南高僧嶺所管南至團池古羔分水西至秦關柵村道下面東西石楞并古尼寺下平取正北至雙浮圖下古道以上所管永記於銘後凡七十五字詢訪遺蹟多不可曉問僧但云四至以裏田泉林木皆屬本寺舊時僧無租稅有司尊炎帝故禁民樵採數十年前木皆合抱彌滿山谷近來禁弛盜伐幾盡寺僧賦役同於俗吐蓋有不勝其苦者矣寺東五六里有水焉俗呼爲長河高平志云長河在縣東北南流入丹水河渠渺遠環帶紫紆夏秋之交衆

溪合流水勢若江海渡者艱危至冬始涸愚按水經註云  
長平水出長平縣西北小山今此水在縣東北非古所謂  
長平水也山之西二十里曰丹朱嶺其古之丹林歟水經  
註引山海經云沁水之東有林焉名曰丹林丹水出焉卽  
斯水矣又引地理志云高都縣有堯谷丹水所出東南入  
絕水是也又引竹書紀年云晉出公五年丹水三日絕不  
流魯公九年丹水出相反擊卽此水也考其時在白起趙  
括之前已有丹水之名高平志引方輿勝覽云白起坑趙  
卒血流成河故名丹水又云丹朱嶺在縣北四十里長子  
縣界以堯長子丹朱得名此二說皆謬蓋本丹林年久伐

盡不復有林矣遂訛爲丹嶺而朱乃後人妄加耳長子讀如長短之長見顏師古漢書註春秋左傳云魯襄公十八年晉人執衛行人石買于長子執孫蒯于純留竹書紀年云梁惠成王十二年鄭取屯留尙子屯留卽純留尙子卽長子古音相近互用無關於丹朱也是時鄭已滅矣此云鄭者蓋韓懿侯也見史記韓世家註又西二十里曰傘蓋山泝水出焉山西通志云傘蓋山在長子縣西南五十里以形似名下有水名泝水水經註云泝水導源泝氏縣西北元谷東南流逕泝氏故城南而東會絕水亂流東南入丹水是也寰宇志云神農嘗五穀之所上有炎帝廟南帶

太行西有繖蓋山卽此山也又西北三十里曰發鳩山山下有泉泉上有廟宋政和間禱雨輒應賜額曰靈湫蓋濁漳水之源也廟中塑如神女者三人傍有女侍手擎白鳩俗稱三聖公主乃羊頭山神之女爲漳水之神漳水欲漲則白鳩先見使民覺而防之不致暴溺羊頭山神指神農也然白鳩事諸志未載以其近怪故不語耳愚按山海經云發鳩之山漳水出焉有鳥名曰精衛炎帝少女遊於東海溺而不返化爲此鳥常銜西山木石以堙東海故陶詩云精衛銜微木將以填滄海蓋用此事然則俗語亦有所本矣周禮職方氏曰冀州其川漳其浸潞許氏說文曰潞

冀州浸也上黨有潞縣闕駟曰潞水爲冀州浸卽濁漳也  
後漢書註引上黨記亦謂潞卽濁漳然則清漳爲漳濁漳  
爲潞明矣山西通志云潞水在潞城縣東十五里微子城  
發源西流合濁漳此說非也潞爲冀州巨浸豈小水耶濁  
漳卽潞近乎理矣潞水逕羊頭山西北去山五十里山之  
陰凡有泉皆北流入於潞水山之陽凡有泉皆南流入於  
丹水古所謂泫氏者卽今高平也所謂高都者卽今澤州  
也羊頭山在太行之北一百五十里衆山最高處俯視太  
行猶在下矣高平志云羊頭山在縣北四十里危峰秀拔  
勢凌霄漢日夕諸山俱曠而此峰返照猶光故俗傳此山

比天下名山高三尺然非山高地勢高耳秦并天下置郡縣以此地極高與天爲黨故名上黨郡卽今潞安府及澤州所屬皆古上黨郡地至隋仍置上黨縣屬潞州今之長治縣卽舊上黨縣也山之東南八里曰故關村村之東二里曰換馬鎮鎮東南一里許有古塚垣址東西廣六十步南北袤百步松栢茂密相傳爲炎帝陵有石欄石柱存焉蓋金元物也愚按路史神農氏七十世有天下軒轅氏興受炎帝參盧禪封參盧於潞守其先塋以奉神農之祀參盧之後政衰其國浸削至春秋時爲晉之附庸焉蓋因國小無綱紀禮法而民俗鄙陋頗同夷狄然以火王猶知尙

赤故謂之赤狄潞氏潞子嬰兒娶晉景公之姊伯姬爲夫  
人其臣酈舒專政虐伯姬而殺之魯宣公十五年夏六月  
晉荀林父帥師滅潞事載左傳今潞城縣東北四十里有  
古潞城卽其國也其國至神農塚一百六十里此爲先塋  
理或有之又按神農塚天下有二焉其一在湖廣衡州府  
鄱縣載於祀典每三歲遣官祭其一卽此塚元成宗大德  
九年亦嘗遣祭禁樵採然南北二塚相去三千里世代久  
遠是否真僞莫知其詳今此墳側有神農廟有司歲時致  
祭焉又按諸志凡羊頭山以形命名隨處有之在冀州之  
域者有三其一卽此山其一在汾州西北十五里見一統



志其一在古穀遠縣沁水所出見漢書及水經註今沁源縣綿山是也神農嘗穀之所亦有三焉其一卽此處其一在潞安府東北十三里百穀山其一在隰州東四十五里合桑村有古穀城穀臺是也若夫神農廟宇在處尤多茲不足紀蓋皆鄉民積年私建謂之行祠云律家考秬黍率曰羊頭山叩其詳多不知附此以資談論而已